

A D V I S

D O N N E

A V R O Y,

Sur l'Estat present des
affaires de Rome.

S O V S V R B A I N V I I I.

P O U R représenter au vray l'Estat auquel
sont les affaires aujourd'huy à Rome, il
semble estre expedient faire relation de ceux
qui sont employez en ceste Cour, & apres des
affaires qui y sont sur le tapis, car par ce moyen
on pourra cognoistre les inclinations, les intereits,
le pouuoir & autorité de tous ceux qui ont part
au gouuernement. Et sur cela, il sera aisé de for-
mer vn iugement de ce qu'on en peut esperer pour
le bien du seruice de sa Majesté.

Pour commencer par le chef, sa Saincteté est as-
sez cogneuë en France, y ayant plusieurs encores
viuans qui ont traicté & negocié avec luy, & en-
tr'autres Messieurs de Bethune, d'Alincourt, de

2
Breues, Marquis de Tresnel, & de Cœuëre, qui
cognoissent son naturel, & en pourroient donner
information à sa Majesté, & à Messieurs les Mini-
stres de l'Etat: Le Pape n'a gueres changé d'hu-
meur, ny de façon de faire, estant aussi franc & li-
bre qu'il a esté iamais. Il est grandement sçauant
aux bonnes Lettres & Poësie, es langues Grecque
& Latine, & en Jurisprudence aussi: il aime pas-
sionnément les liures, les gens de lettres, & se plaist
grandement en leur conuersation, lors qu'il peut
prendre quelque relasche aux affaires: il est d'une
humeur prompte, ardente, vn peu cholere, mais
qui reuiet aisément, & se paye de raison, & qui à
la chaude luy vouldroit contredire, il y auroit dan-
ger d'une grande rupture, mais qui a vn peu de
phlegme & de patieëce, il en vient aisément à bout,
en luy faisant voir ce qui est de la raison, estant
remply de tres-bonnes intentions pleines de pieté
& de zele enuers Dieu, nostre Religion, & toute la
Chrestienté. Et sur tout enuers la personne du
Roy, & de son Royaume. On a cogneu que le Pa-
pe n'est pas obstiné en ses opinions, en affaires de
tres-grande importance, souuent on l'a veu chan-
ger. C'est pourquoy plusieurs Ministres des Prin-
ces se deffient qu'il ne change de resolutions; il est
fort courageux, desireux d'honneur & de gloire,
impatient de recevoir vne iniure. Il aime ses freres
& ses nepueux, & ses plus proches tendrement,
mais iusques icy il n'a donné aucun signe, ny tes-
moignage de desirer (comme ont fait les autres
Papes) avec passion, la grandeur de sa maison. Il a
vacqué près de deux cens mil escus d'offices, sans
qu'il

3
qu'il en ait voulu donner vn seul à son frere, & à ses nepueux, disant que la Chambre est trop en-
debtee, preferant non seulement les intereſts du
public en ce qui touche les Princes, mais en ce qui
touche les affaires ordinaires de la Cour, aux inte-
reſts de sa maison. Et iusques icy le Cardinal Bar-
barin son nepueu, n'a pas eu cinq à six mil escus de
rente, encores qu'il y ait eu plusieurs vacquances
qu'il a donnees à diuers Cardinaux.

Si la Sainteté persiste en cet humeur de prefe-
rer les intereſts du public à ceux de sa maison, on
doit esperer d'vn icune Pape plein de vigueur &
de zele de grands effectz, y ayant apparence, par
raisons humaines, estant si robuste, qu'il pourra te-
nir le Pontificat vingt ans, & plus: Auant son Pon-
tificat, il a tousiours tesmoigné; & en public & en
particulier, auoir vne tres-grande inclination à la
France, à la personne du Roy, comme ayant receu
l'aduancemēt de sa fortune en France, & en ayant
l'obligatiō principale au feu Roy Henry le Grand
de bonne memoire, duquel il a tousiours fait pro-
fession d'honorer la memoire, Et me souuient que
lors que ie le fus voir, incontinent apres la mort
du feu Roy, ie le vis pleurer amèrement, avec de
grandes larmes & sanglots; Monsieur de Breues
qui estoit icy en pourra aussi rendre tesmoignage.
Depuis son Pontificat il ne s'est peu empescher de
faire paroistre par les effectz son inclination, ayant
mis tous les Ministres d'Espagne en grande ialou-
sie. Le Duc d'Alburquerque qui partit derniere-
ment de Rome, en fist des plaintes publiques, &
sa femme aussi, qui disoit, touchant ce que pour

estre bien venu au Palais, il falloit aller vestu à la Françoisse. Desia par deux fois, que ie sçay, le Pape s'est picqué contre l'Ambassadeur d'Espagne: l'un des sujets a esté sur le fait de la Valtoline, & l'autre pour le regard de Monsieur de Maximi Nonce en Espagne, que les Espagnols vouloient retenir en sa charge, contre la volonté de sa Sainteté. Et voyant qu'ils ne l'ont peu obtenir, ils luy ont donné l'Archeuesché de Cathance en Sicille, qui vaut quinze mil ducats de rente, ce que le Pape n'a pas aisément digéré, quoy qu'il l'ait dissimulé. Autres fois les nepueux Cardinaux auoient le principal maniment des affaires: mais aujourd'huy le Seigneur Carlo Barbarin, frere de sa Sainteté, est le plus employé, & avec luy principalement Monseigneur Magalotti beau-frere dudit Seigneur D. Carlo: Toutes les principales affaires & importantes du Pontificat se traictent, & se resoluent par eux. Ledit Seigneur D. Carlo est homme soit sage, discret, & grandement prudent, qui a esté toute sa vie employé, ou à l'Oeconomie, ou à la negotiation, sans auoir part aux affaires publiques. Maintenant il gouuerne absolument, comme general de l'Eglise, tout ce qui dépend de sa charge, employant ses amis, sans rien communiquer au Duc Sauelli son Lieutenant, que peu à peu il a enuie de licentier.

Pour auoir des graces, faueurs, quelques offices ordinaires de sa Sainteté, il est grandement puissant: mais iusques icy le Pape n'a pas pris creance en luy en ce qui est des interets publics de la Chrestienté, & bien souuent il ne les sçait que par ce que

ce que les luy fait ſçauoir Monſieur Magalotti, il a bien recherché aux occaſions de ces vacquances quelques bienfaits, pour ſes enfans, mais ayant recogneu l'intention de ſa Sainteté, il n'a oſé repliquer. Monſieur le Cardinal Barbarin eſt vn ieune Cardinal de vingt & vn, ou vingt-deux ans, quia eſté bien nourry, & inſtruit, ſage, courtois, & quia bien eſtudié aux bonnes lettres: il prend plaiſir aux cheuaux, à la chaſſe, & à la conuerſation des gens de lettres: Le Pape deſire qu'on traite avec luy d'affaires, afin de le façonner, & de l'en rendre capable, mais non pas pour prendre, ny aduis, ny conſeil de luy, ne faiſant autre choſe que rapporter ce que luy diſent les Miniſtres des Princes & de l'Eſtat, ſans ſ'entremettre de donner aucun aduis: il eſt cogneu par la Cour vn peu prompt & cholere, mais il retourne aiſément. Il eſt grandement aimé, on croid qu'à meſure que le Pape ſ'enuieillira, & que luy ſe rendra capable du maniment des affaires, ſon credit & autorité croiſtra, & croirois qu'il ſeroit tres-bon ſ'il ſuruenoit quelque occaſion de vacquance en France de quelque bonne Abbaye de luy donner, pour l'obliger en ces commencemens au ſervice du Roy, veu que deſia luy meſme teſmoigne publiquement en ſes diſcours auoir vne tres-grande inclination à la France, comme cauſe & origine de la grandeur de leur maiſon. Il m'a deſia par trois fois repeté ce diſcours en ces termes. Le Seigneur D. Taddeo fils de D. Carlo, & frere dudit Cardinal eſt vn ieune Seigneur de 18. à 19 ans de belle taille, bien adroit, le plus honneſte, le plus courtois qui ſoit en toute

la maison, aimé de toute la Noblesse de Rome par son humilité & modestie: le Pape a vn tres grand soin de luy faire apprendre toutes sortes d'exercices dignes d'un Cheualier. Celuy-là est le bien aimé du Pape, & sur lequel on a ietté le principal fondement de la conseruation de la maison. On croit que celuy-là croissant en aage sera plus puissant qu'aucun autre des nepueux du Pape. Il luy fait des caresses extraordinaires, & ne luy desnie iamais rien. Si on pouuoit attirer ce ieune Seigneur au seruice du Roy, on pourroit esperer beaucoup de ce Pontificat. Le Seigneur D. Antonio 3. fils du Seigneur D. Carlo, a esté fait Cheualier de Malte, il a desia vn grand Prieuré & yne Commande, il a enuiron quinze à seize ans, on dit qu'il a l'esprit ardent, trop esueillé, qui n'a pas la douceur & courtoisie de ses freres, aussi à ce que l'on dit, le Pape le rudoie fort souuent, pour tacher de polir cet esprit rabotteux. On l'a fait General des Galleres de sa Sainteté, qui seront conduites dorefnauant par le Commandeur Nari Lieutenant general des Galleres, qui est vn braue Cavalier, & frere d'un seruiteur de sa Majesté. Le frere du Pape, qui est Capussin, estimé tres-bon Religieux de sainte vie, le Pape l'a retiré au Palais, en intention, comme tout le monde croit, de le faire Cardinal aux premiers iours. On n'a peu recognoistre son naturel, ses inclinations, ny son talent, au maniment des affaires, desquelles il n'a iamais eu cognoissance, & iusques à ceste heure, il n'a nullement esté employé hors de quelques interrets de deuotion & de pieté. Personne ne peut
pre-

pretédré de gouverner le Pape, lequel veut qu'on croye, que luy seul gouverne : mais si quelqu'un a quelque pouvoir sur l'esprit de sa Saincteté, c'est Monseigneur Magalotti, aujourd'huy Secretaire des Princes, c'est à dire, seul Secretaire d'Estat, qui a entre les mains toutes les affaires des païs estrangers, les interets des Princes de tout l'Estat Ecclesiastique, & avec lequel quasi seul le Pape se conseille. Ce Prelat est frere de la belle sœur du Pape, femme de D. Carlo, mere des nepueux & nieces du Pape, il a esté esleué dès son ieune aage par sa Saincteté, qui s'en est seruy en toutes ses affaires. Il le mena à Boulogne pour son Vicelegat : Le Pape l'aime, & l'estime cōme sa creature, & est d'humeur quasi semblable à celle de sa Saincteté, ardent, vigilant, studieux, d'une belle physionomie, estimé fort habile homme en ceste Cour. Il a esté employé si tost qu'il se mit en Prelature à la requeste de sa Saincteté, par le feu Pape Paul V. en plusieurs Gouvernemens, Vicelegations, & autres principales charges de l'Estat Ecclesiastique, lesquelles il s'est bien comporté : il n'y a iamais eu autre plainte de luy, sinon qu'il estoit trop hardy, & gouvernoit avec un peu de violence, du depuis il trouua moyen de s'insinuer aux bonnes graces du Cardinal Ludouiso, qui luy donna cognoissance de ses affaires, le fait Secretaire de la Consulte, & s'en est fort seruy, & tient-on que la consideration de Monseigneur Magalotti & sa negociation, feit resoudre le Cardinal Ludouiso de consentir si franchement à l'Election du Pape. On n'a assuré que les Espagnols le muguetoient & recherchoiēt

comme celuy qui pendant tout le Pontificat, sans doute sera le plus puissant, ayant vn tres grand ascendant sur l'esprit du Pape, qui luy a tres-grande creance. On n'a peu descourir son inclination enuers la France, & enuers l'Espagne, sans doute à la premiere promotion il sera Cardinal aussi tost que frere mesme. Autresfois i'ay eu grand accez avec luy, & amitié particuliere, & encores à ceste heure il me fait demonstration de bien-vueillance, mais de peur de donner ialousie, on n'ose traiter avec luy iusques à ce qu'il soit Cardinal. Vn de ceux qui est de plus de consideration près de sa Saincteté, c'est vn ieune Seigneur, qui a tres-bien estudié aux bonnes lettres, fait bien des Vers en Latin, & mieux en Italien, fort studieux, & qui prend grand plaisir en la conuersation des gens de lettres, se nomme Monseigneur Virginio Cesarini. Pour ceste raison il s'est insinué près de sa Saincteté, qui luy a tousiours tesmoigné grande bien-vueillance: Et si tost qu'il fut Pape, il le declara son Maistre de Chambre. Ce ieune Seigneur est fort maladis, & est quasi tousiours au liest, les Medecins disent qu'il est menacé de deuenir etique, & il y a apparence qu'il ne soit pas de longue vie. Au commencement le Pape luy communicuoit quelques affaires, & prenoit-on aduis de luy: mais à ce qu'on dit le Seigneur D. Carlo, & Monseigneur Magalottli'ont vn peu esloigné, si qu'aujourdhuy il n'a nulle part aux affaires. Et mesmes on tient à Rome qu'en ceste premiere promotion il n'y aura pas place pour luy, dont les subjects & seruiteurs du Roy ne sont pas faschez, car ceste maison est tout
à fait

à fait Espagnole, alliee avec les Cajetans, & dépend entierement de la maison de Farneses: tellement que ce seroit en effect vn Cardinal Espagnol. Celuy qui a le premier lieu apres le Maistre de Chambre en la maison du Pape, est le Seigneur Hieronimo Stefanutio Copiero de sa Saincteté, il est Gentilhomme de Todde, de fort bonne maison, il a seruy le Pape vingt ans entiers, & a demeuré tousiours en France avec sa Saincteté, le seruant de Maistre de Chambre, le Pape y a vne très grande confiance, comme à vn vieil & fidelle seruiteur, & se descharge avec luy de toutes ses pensees les plus cachees, toutesfois aux affaires publiques iusques icy il n'a pas esté employé, & dit-on que c'est à cause qu'il est souuent malade de la goutte. Je l'ay tousiours trouué tres-enclin à la France, & n'aimant gueres les Espagnols, pendant seize ou dix-sept ans que ie l'ay pratiqué familièrement, on pourroit esperer de luy aisément quelque bon office pour le seruice du Roy. Le Seigneur Ciampoli Secretaire des Briefs de sa Saincteté, & des Memoriaux, est aussi grandemēt employé, il est Florentin, & n'y a pas long temps qu'il estoit icy à Rome, avec peu de moyens, il est fort sçauant, eloquent, bon Poëte, qui parle bien Latin, ce qui luy donna entree près le Cardinal Cobelluccio, & lors que Monseigneur Sterozze se retira à Florence, le feu Pape Paul V. le fit Secretaire des Briefs, par sa dexterité, il s'est conserué en ceste charge sous le temps de Gregoire X V. Et ayant habitude avec sa Saincteté, comme homme de lettres, il a conserué non seulement sa charge, mais

a eu la Secretairie des Memoriaux. Il est employé aux affaires en partie sous Monseigneur Magalotti, & est vn de ceux que les Espagnols recherchèt grandement, & feront ce qu'ils pourront pour le gaigner. Vn de ceux qui sont les mieùx venus de gens d'espee, est le Seigneur Berardino Nari Capitaine des Gardes de sa Sainteté, qui est ancien seruiteur, & pensionnaire du Roy. Il a esté nourry page de la Chambre de la Reyne Mere, depuis il a seruy le Roy aux armées, & a eu quelque temps vne Enseigne au Regiment des Gardes, dès ce temps là le feu Roy luy donna deux mil liures de pension, qui luy a esté accreué iusques à trois mil, qu'il merite bien, car il a tousiours tres-bien & tres-dignement seruy le Roy, depuis qu'il est de retour à Rome, comme scauent Messieurs nos Ambassadeurs. Il y a vingt ans & plus que le Pape lui a tousiours tesmoigné de l'aimer, & que ledict Seigneur Nari sert sa Sainteté, & en France, & en Italie, viuant avec lui en tres-grande priuauté, laquelle il continuë encores auiourd'huy, estant vn de ceux avec laquelle Pape s'entretient plus volontiers, & à qui il tesmoigne plus de bien-vueillance, & tient-on que le Pape, à sa consideration, a fait son frere le Commandeur, Lieutenant general des Galleres. Et l'autre frere, qui est Prelat, a esté déclaré Prefect de Lannone, & on croit qu'il sera bien tost Cardinal, ou au moins Auditeur de la Chambre, qui est la premiere dignité apres le Cardinalat. Sa Majesté se peut asseurer entieremēt du seruice dudit Seigneur Nari Gentilhomme d'honneur, plein de gratitude. Monseigneur Vulpio est

Secre-

Secretaire des Brefs en chef, vn Prelat ancien, qui
 a eu vn grand maniment d'affaires, il a esté Nonce
 extraordinaire en Espagne, Secretaire de la Con-
 gregation des Euesques, Dataire. Il est tenu pour
 sçauant, habile homme, tres homme de bien, mais
 vn peu ardent, & qui souuent a rompu avec plu-
 sieurs Cardinaux & Prelats, estant Dataire, il ne se
 peut accommoder avec l'humeur du Cardinal Lu-
 doufio : tellement qu'on luy osta la Datarie, & le
 renuoya-on à son Euesché, mais la mort du Pape
 Gregoire XV. luy vint bien à propos. Ce Prelat est
 Milannois, & Euesque de Notarre, fort seruiteur
 du Cardinal de Sauoye, & a tousiours tesmoigné
 vn grand respect au Roy & à la France, aux affai-
 res qui se sont presentees, dont Monsieur le Mar-
 quis de Cœuvres en est bon tesmoin, & moy mes-
 me le puis asseurer, le Pape le voit volontiers, com-
 me vn hōme experimenté aux affaires: on le tient
 pour Cardinal à la premiere promotion. Pour vn
 sujet du Roy d'Espagne, veritablement nous nous
 en pouuons grandement leuier, en l'affaire des Mi-
 nimes pour le Couuent de la Trinité du Mont, il
 prist l'affirmatiue pour les François, contre les Si-
 ciliens & Calabrois, qui vouloient empieter sur ce
 Monastere destiné à nostre nation. Monseigneur
 Iczi Maggiordone du Pape, est vn Prelat de Bou-
 logne, il a esté 7. ou 8. ans Ambassadeur à Venise,
 depuis il a esté Gouverneur de Rome: c'est vn
 homme fort couuert & dissimulé, & est fort mal-
 aisé de penetrer son inclination: Durant le Ponti-
 ficat de Paul V. il a tesmoigné peu d'affection &
 de respect aux François, & à la Nation, soit en cela

qu'il suiuiſt l'humeur du Cardinal Bourghese, ou bien sa propre inclination. Celui-là est aussi en predicament d'estre aussi Cardinal à la premiere promotion, neantmoins peu de gens le croyent. Le Seigneur Gioorimi de Glieffeiriscalcho de la Saincteté est aussi fort bien venu. Le Pape de longue main a vescu familièrement avec luy, pendât qu'il estoit en France, & du depuis qu'il est de retour à Rome, il a esté nourry en France, il y est assez cogneu, & a deux mil liures de pension de sa Majesté, dont ie croi qu'il a esté mal payé depuis trois ou quatre ans, neantmoins il n'a laissé de seruir sa Majesté, & Messieurs les Ambassadeurs: Le Pape lui fait careſſe, & prend plaisir de discourir avec lui, estant d'humeur ioyeuſe, & de bonne compagnie, & qui a tres-bon esprit: & partant homme de seruice, dont on peut tirer des aduantages pour le seruice du Roy. Entre les principaux Officiers de la Cour, celui du Dataire tient le premier lieu, par les mains duquel passent toutes les graces & expeditions. Ceste place est remplie de Monſieur de Cauallieri Auditeur de Rote, Gentilhomme Romain, de bonne & ancienne maison, aagé enuiron de 60. ans. Il y a 40. ans qu'il est employé aux charges, estimé fort homme de bien, de bon sens, mais d'une humeur fort pesante, estant fort cassé & indisposé de maladies, & n'est pas trop propre au travail. Il y a 30. ans & plus qu'il vit en grande amitié & familiarité avec le Pape, qui l'a tousiours aimé & estimé. On tient qu'à la premiere promotion, sans difficulté, il sera Cardinal: c'est vne paste d'homme, dont on fait les Papes, n'estant engagé

engagé à pas vn Prince, d'vn naturel doux & facile, qui fait volontiers plaisir: Il n'a point d'ennemis, & gueres de parons, qui sont qualitez aduantageuses pour vn Cardinal Papable, à cause de la pesanteur & indisposition dudit Dataire, le Seigneur Abbate Visini Soudataire manie quasi toute la Datarie, il est Liegeois de nation, qui a esté nourry à la pratique de la Datarie & Chancellerie, & auoit charge de controoller les Suppliques de Signature, ce qui luy a donné entrée auprès du Pape, pour lors Prefect de la signature. C'est vn ieune homme de trente, ou trente-cinq ans, plein de viuacité, & qui auourd'huy a le maniment de toute la Datarie & Chancellerie, & qui peut beaucoup seruir en ce Pontificat: Il a esté nourry parmi nous autres François, & tesmoigne auoir de l'affection pour le seruice du Roy.

A Pres auoir representé ceux qui sont employez, & qui tiennent quelque rang en la maison du Pape, il est raisonnable de faire mention du College des Cardinaux, qui sont les Princes de la Cour de Rome, & qui sont considerables, principalement à cause de l'Eslection du Pape. Et encores que tous les Cardinaux ayent voix en ladite Eslection, neantmoins huiet ou dix Cardinaux sont les Papes, tous estans r'aliez sous la conduite chefs: La plus grande & plus forte faction est celle du Cardinal Borghese, qui a encores pres de vingt Cardinaux, dont il peut à peu pres disposer. Apres elle est celle de Ludouiso, sous laquelle se sont remis ce qui reste de creatu-

res d'Aldobrandin. Celle d'Espagne en nombre apres ces deux-là est la plus grande, mais ils sont grandement diuisez entr'eux, & tousiours au Conclauē ils se trouuēt les plus foibles. Celle de France est assez petite, mais ordinairement peu diuisee. Il y a aussi la faction des Princes d'Italie diuisez en deux, qui vont sous la cōduite de Messieurs les Cardinaux de Sauoye & de Medicis, avec lesquels s'est vny ce qui reste de creatures de Sixte V. Il y a aussi la faction des hommes spirituels qui font profession n'auoir aucunes dépendances, ny de Princes, ny de nepueux de Papes, & sans autre consideration que d'esslire vn Pape des plus saincts & des plus deuots qui soient au College. En representant le discours & l'estre de chacun des Cardinaux, l'on pourra plus facilement recognoistre leurs inclinations. Le Doyen des Cardinaux est le Cardinal del Monte aagé de 77. ans, ou enuiron: il est de la maison des Seigneurs del Monte di sancta Maria, qui se disent issus d'un bastard de la maison de Bourbon en porte le nom & les armes. Ce Cardinal a esté tousiours dès sa ieunesse amy inthime & iuré de feu Ferdinand grand Duc de la Toscane, & auparauant du Duc François pere de la Reyne Mere: Le feu Duc Ferdinand luy fit donner son Chapeau par le Pape Sixte V. Il a esté tousiours dependant, & tesmoigné grande gratitude à la maison de Florence, & sur tout il fait profession d'une grande seruitude à la Reyne Mere, & a tesmoigné par trop d'inclination à la France. C'est pourquoy les Espagnols luy ont donné aux trois derniers Conclauēs l'exclusion ouuerte,

sans

sans laquelle il seroit Pape, estant aimé de tout le College, tenu debonnaire, affable, de vres bonne conuersation : Depuis deux ou trois ans il est deuenu fort cassé, & mesmes quelques vns disent que les forces de son esprit sont diminuées avec celles du corps. Le Souf-Doyen des Cardinaux est Sforze né d'une maison illustre assez cognüe en Italie, le Seigneur Giacomo Buon Compagni fils du Pape Gregoire XIII. espousa sa sœur & procura qu'il fut fait Cardinal pensant que ses enfans succederoient aux biens dudit Sforze, mais il con-
toit sans son hoste, car ils s'est trouué que tous lesdits biens estoient substituez au Duc Sforze, lequel en a obtenu vn Arrest solemnel à la Rote. Il y a quarante ans qu'il est Cardinal, son inclination est plustost à la guerre qu'aux lettres : aussi les Papes l'ont employé à la poursuite des Banois. C'est vn Cardinal qui a tousiours aimé ses plaisirs, encor qu'il soit assez riche de son patrimoine, neantmoins il est tousiours endebté, ayant douze mil escus de rente ou enuiron en l'Estat de Milan. Il a tousiours fait profession de dependre d'Espagne, & maintenant encor plus qu'il est entré en pretention d'auoir quelque Euesché en Sicile, aussi fait-il de grandes demonstrations d'estre seruiteur d'Espagne en apparence, mais en effect les Espagnols ne se fient du tout point en luy, & en ont tres-grandes raisons : Car depuis trente ans en ça en tous les Conclaues il ne les a pas suivis, mais encorés il s'est déclaré ou comme chef ou comme partial contre ceux que les Espagnols vouloient faire Papes ; Lors que le Pape Clement VIII. fut esleu,

les Espagnols ayans entrepris de faire Pape Saint
Seuerino, le Cardinal Aquaiua & luy se firent
chefs de l'exclusion: Apres la mort de Clement
VIII. à leur barbe il se declara ouuertement en
faueur du Cardinal de Florence, qui fut Leon XI.
Au penultiesme Conclaue ce fut vn des premiers
qui se declara à l'exclusion de Campora, tant
desiré de l'Espagne, & en ce dernier Conclaue
il n'a gueres fait mieux, Comme il paye les Espa-
gnols d'apparences exterieures, aussi les Espagnols
le payent de vaines esperances, neantmoins on
croid qu'il sera plustost Espagnol qu'autrement, si
ce n'est que ses interests le portent ailleurs. Le
Cardinal Tarneze frere du Duc de Parme, & tu-
teur du Duc d'aujourd huy, fut fait Cardinal par
le Pape Gregoire XI V. à l'aage de seize ou dix-
sept ans, il tient rang de Prince & se traite avec
grande splendeur & magnificence accompagnée
d'une grande douceur & modestie, qui l'a rendu
non-seulement agreable à la Cour, mais aussi à
tous les Papes qui sont venus, depuis l'accident,
qui luy suruint sur les derniers iours du Pape Cle-
ment VIII. le fit resoudre de rechercher par tou-
tes voyes de ne rompre iamais avec pas vn Pape, il
a la suite de quasi toute la Noblesse de Rome, tant
de son chef qu'à cause de l'alliance de Aldobran-
dinus, les interests de sa maison l'ont lié tout à fait
avec l'Espagne; Neantmoins aux Conclaues &
ailleurs il a tousiours fait le chef de party, & bien
souuent a quitté les Espagnols qui vont avec tres-
grand respect avec luy. Il rend grand honneur
aux Cardinaux François, Ambassadeurs & autres
Ministres

Ministres de sa Majesté, & mesmes aux Prelats de la nation & Gentils-hommes particuliers : aussi est-il grandement honoré de toutes sortes de nations, il gouverne aujourd'huy pour son nepueu l'Estat de Parme & de Plaisance, non-pas *in vitta ferrea*, comme faisoit feu son frere, mais avec vne douceur & benignité accompagnée d'une grande Justice; Aussi au lieu que son frere estoit peu aimé, il est aujourd'huy adoré des subjects de son nepueu. Le Cardinal Borromée nepueu de Saint Charles, Archeuesque de Milan, est assez cogneu à cause de la pieté, deuotion & grand zele qu'il a enuers l'Eglise, qui luy a donné souuent sujet de rompre avec les Ministres d'Espagne à Milan, n'ayant fait difficulté à l'exemple de Saint Charles son oncle, d'excommunier les Gouverneurs de Milan, lors qu'ils ont voulu entreprendre sur la Jurisdiction Ecclesiastique, ce qui luy a causé la haine de la nation Espagnole, estant *in capite* exclus par les Espagnols qui l'apprehendent plus pour Pape que tout autre Cardinal quel qu'il soit, disans tout haut qu'ils aimeroient mieux le Cardinal de la Rochefoucaud pour Pape que Borromée, quoy qu'ils confessent qu'il soit d'une vie tres-exemplaire, qui n'a iamais voulu autre benefice que son Archeuesché, qui donne tout son bien aux pauvres; C'est vn des chefs des Cardinaux spirituels, & qui donnera aussi tost la voix à vn Cardinal François qu'Espagnol, pourueu qu'il le iuge capable du Pontificat. Lors qu'on veut faire peur en vn Conclau aux Espagnols, on parle de faire Pape le Cardinal Borromée, lequel a eu plusieurs voix en ce der-

nier Conclaue ; cette peur fut cause qu'ils consentirent si librement à l'Electiō du Pape d'aujourd'huy. Le Cardinal Bardini Florentin de nation fut fait il y a plus de trente ans par le feu Pape Clement huitiesme, estimé vn des plus habiles & adroicts Cardinaux qui soit en ceste Cour, il a demeuré quelque temps en France durant sa ieu- nesse, vn de ses freres fut tué pour le seruice du Roy à Nismes, aussi il a tousiours tesmoigné grande affection & inclination à la France, Il a sceu sagement dissimuler, ayant avec sa dexterité gaigné la bonne grace des Ministres d'Espagne, en façon qu'ils ne l'ont iamais exclus ouuertement. Il est fort sçauant aux bonnes lettres, en la Iurisprudence, & encores plus aux affaires d'estat: Il a seruy de conseil sous le Pontificat de Gregoire X V. & y a eu grande part: Pour cesté consideration, & à cause qu'il est creature des Aldobrandins, le Cardinal Borghese au dernier Conclaue luy fist sous main donner l'exclusion: Neantmoins il a tant d'amis, qu'il souuent il a eu plus de la moitié des vœux, & a fait trembler Borghese, & tient-on de plus que la peur qu'il eut qu'en fin Bardini ne l'emportast lui fit prendre party d'essire le Pape d'aujourd'hui, qui n'estoit pas des premiers que desiroit Borghese. Ce qu'on lui obiecte est qu'il a trop grande quantité de parens, ayant so. ou nepueux, ou petits nepueux, deuant que ceux-là fussent pourueus, personne ne pourroit rien esperer: on lui impute aussi qu'il est trop habile, trop dissimulé, qu'il donne trop de paroles, auxquelles les effects ne correspondent pas. Le Cardinal Genasio est fils d'un
Medecin

Medecin, nay en vne bourgade pres Bologne, son pere luy donna de grands biens, il se fist Prelat, & paruenant peu à peu, il fut enuoyé Nonce en Espagne, & fait Cardinal par le feu Pape Clement viii. c'est vn homme mediocrement versé aux lettres qui fait profession d'indepedance enuers les deux Couronnes: Lors qu'il fut fait Cardinal estant Nonce en Espagne, il estoit tres-mal avec les Ministres du Roy Catholique, mais depuis il s'est bien r'accommodé avec les Espagnols: l'ay veu souuent Messieurs nos Ambassadeurs reuoquer en doute s'ils lui deuoient donner l'exclusion, mais le feu Cardinal Aldobrandin, tant qu'il a vescu l'a empesché. Il a plus de 72. ans, & dit-on de luy que les forces de l'esprit aussi luy diminuent avec celles du corps, toutesfois il n'en paroist rien en public. Le Cardinal Detiparent du feu Pape Clement 8. fait Cardinal à l'aage de 17. ans, sa ieunesse & peu de conduitte le rendirent peu agreable audist feu Pape: Il a employé son temps à prendre ses plaisirs, depuis quatre ou cinq ans en ça, il est deuenu tout estropié de gouttes, & ne se trouue, ny en Chappelle, ny en Congregation, aussi ne fait-on pas grand compte de luy, & dit-on qu'il n'est pas trop agreable au Palais, & que c'est vn des trois qui donnerent leur voix contre le Pape, au moins c'est vn bruit commun. Le Cardinal Dietristin est en Allemagne, & ne paroist gueres à Rome, il est subject de la maison d'Austriche, & aux Conclaves où il s'est trouué, il a esté tousiours Espagnol déclaré, aussi bien que le Cardinal Zappata Espagnol de nation, lequel estant plus que septuagenai-

re, vray ſemblablement ne paroiftra plus à Rome. Le Cardinal Madrutio Allemand, Eueſque & Prince de Trente, eſt maintenant reſidant à Rome, eſtimé d'humeur tres-douce, affable, & de bõne conuerſation: ſa maifon eſt du tout engagee au ſervice d'Eſpagne, & luy meſme en reçoit quelques pñſions, & bien-faits, & neantmoins aux occasions qui ſe ſont preſentees, & ſur tout au Conclau de Gregoire X V. il a teſmoigné courageuſement qu'il n'eſtoit pas eſclau de Eſpagne, ayant ouuertement donné l'excluſion au Cardinal Cam-pora, ſ'il n'auoit le peché originel eſtant Tramountain, & ſi ſes proches parens n'eſtoient pas trop engagez à l'Eſpagne, ce ſeroit vn des bons ſujets papables qui ſoient à Rome, eſtant vniuerſellement aimé de tout le College, & de toutes les nations. Le Cardinal d'Eſt tient rang de Prince, frere du Duc de Modene: il fut fait Cardinal par le feu Pape Clement V I I I. par le Traicté de Ferrare, il a tres-bon eſprit, bien eſueillé, bonne mine, & pluſieurs amis en ceſte Cour, eſtant aſſez facile, bien affable, ſans feinte, ny vanité: il eſt en tres-bõne intelligence avec le Cardinal de Medicis, mais il fait profeſſion plus eſtroite d'amitié avec le Cardinal de Sauoye, à cauſe de leurs alliances: Autres-fois on auoit traitté du temps de Monsieur de Bethune, de luy donner la Comprotection de France, & du regne du feu Roy, l'affaire eſtoit comme concluë: Mais au Conclau qui ſruint pour lors, l'edit Seigneur Cardinal voulut aller obſtinément à l'excluſion du Cardinal Baronio, dont le feu Roy s'eſtant offenſé, tout le traicté fut rompu, & il s'eſt
ictté

ietté entre les bras des Espagnols, qui ne le trait-
 tent gueres bien, ne pouuant estre payé des pen-
 sions qu'on luy promet : Aussi au Conclaué il a
 beaucoup plus de soin de ses interests, & de ceux
 de son frere que de ceux d'Espagne : Ce fut vn de
 ceux qui aida à faire le Pape Leon X I. contre la
 declaration des Espagnols : On dit qu'en ce Ponti-
 ficat il ne peut pas beaucoup, aussi est il fort rete-
 nu à demander. Le Cardinal Pio fut fait Cardinal
 à l'aage de 17. ou 18. ans par le feu Pape Clement
 V I I I. Il est sorti de la maison des bastards de Sa-
 uoye, qui se sont habitez à Ferrare : c'est vn habi-
 le homme, d'vn grand esprit, tres-capable des af-
 faires, & qui peut bien seruir. Ce qu'ayant reco-
 gnu Messieurs nos Ambassadeurs, ils ont desiré de
 l'attirer au seruice du Roy : mais parce qu'il a touf-
 jours pretendu (estant sorti d'vne maison de Prin-
 ce) d'estre mieux traité que les autres Cardinaux,
 à cause de la consequence, on n'a rien conclu avec
 lui, bien est vray qu'il a tousiours tesmoigné n'a-
 uoir point d'inclination aux Espagnols, ses prede-
 cesseurs ayans esté tousiours seruiteurs de la Fran-
 ce, aussi il ne s'est iamais voulu engager avec eux : si
 ce n'estoit ceste consideration, ce seroit vn sujet
 qui pourroit bien seruir le Roy, estant seulement
 aagé de 40. ans, courageux, qui sçait beaucoup, as-
 sez aimé au College. Bien est vray qu'il est de pre-
 sent grandement engagé d'amitié avec le Cardinal
 Ludouiso, qui en dispose comme vne de ses
 creatures, & y auroit danger que ceste amitié ne
 l'empeschast d'estre bon François, à cause des inte-
 rests que ledit Cardinal Ludouiso a avec l'Espa-

gne. Le Cardinal Beuilaqua fils du sieur Marquis Beuilaqua Ferrarois, incontinent apres la reduction de Ferrare fut fait Cardinal par le feu Pape Clement VIII. Il est fort courtois, & honneste, rempli de belles paroles. Depuis 20. ans en çà, il s'est declaré seruiteur du Roy, ayant vne pension de sa Majesté de cinq milliures, il est fort attaché à ses interets, & à cause que sa pêsion ne lui est gueres bien payee, il y a tousiours quelques plaintes de sa part: neantmoins aux Conclauës passez, il a tousiours esté avec la France, & mesmes au Conclauë dernier. Monsieur l'Ambassadeur le retint en deuoir, & suiuit le Cardinal de Sauoye: La pluspart du temps il se tient à Ferrare, quelques-vns disent que c'est par espargne, on en peut faire estat aux occasions des Conclauës: mais il faut penser à payer la pension pour en disposer tout à fait. Le Cardinal Doria est quasi tousiours residant en Sicile, estant Archeuesque de Palerme: & partant n'est pas cogneu, & fort peu estimé en ceste Cour. Il se trouue ordinairement aux Conclauës, & suit en tout la faction d'Espagne, côme les Espagnols naturels. On peut dire le mesme du Cardinal Spinola, quand il se trouueroit aux Conclauës, ce qui arrive peu souuent, car il demeure la pluspart du temps en Espagne. Le Cardinal Perracti a esté fait Cardinal par le feu Pape Clement VIII. à la nomination du Cardinal Montalto, qui l'a tousiours tenu comme sien parent, & quasi comme domestique en sa maison. Il est d'une humeur fort douce & facile, il a logé en sa maison le Prince Perracti son frere, & viuoient ensemble, & croit-on qu'il

qu'il le ralliera avec le Cardinal de Florence, il est assez aimé, estant de douce conuersation, & assez bien estudié aux bonnes lettres. Le Cardinal Bourghese nepueu du feu Pape Paul V. en l'eslection d'un Pape, est auourd'hui le plus puissant, pour le grand nombre de Cardinaux faits par son oncle, qui n'ont autre depédance que la sienne. Les Cardinaux papables craignent de le fascher, comme ayant quasi l'exclusion en main. Il a enuiron 46. ou 47. ans, mais de grâdes incommoditez à sa santé, estant souuent malade de sievres, de gouttes, & sur tout d'une difficulté d'vrine qui le tourmente grandement, & qui l'a reduit deux ou trois fois quasi à la mort: Il est rempli de belles paroles, & courtoises, tant que son oncle a vescu ses courtisans se payoient de ceste monnoye, mais maintenant elle n'est plus de mise. Il a tousiours esté sujet à ses plaisirs, n'ayant pas beaucoup estudié, il ne reüssit pas aux fonctions de sa charge, & fort peu au maniment des affaires d'Estat, auxquelles il n'applique pas fort son esprit. Beaucoup de Ministres des Princes, & autres qui ont negocié avec luy, se plaignent qu'il oublie aisément ce qu'il a promis, & partant qu'il ne se faut pas beaucoup fier à ses promesses. Messieurs d'Alincourt, de Breues, de Tresnel, & de Cœuure, qui ont seize ansentiers traité d'affaires avec lui, sçauront mieux représenter que moy son naturel. Il est tenu pour vn des plus interessez hommes qui viue, peu splendide, & liberal, ce qui est cause de la pluspart des fautes qu'il a fait, il est fort bien auourd'hui avec le Pa-

pe, la memoire estant encore recente de l'obligation que la Saincteté luy a : car non seulement il ne pouuoit estre Pape sans Bourghese, mais il est certain qu'il l'a aidé puissamment au dernier Conclau : Apres auoir tenté de faire quelques Cardinaux ses confidens, il se laissa persuader d'élire le Pape d'aujourd'hui. Ledit Seigneur Bourghese, tant que son oncle a vescu, & au premier Conclau d'apres, a tousiours fait paroistre vne grande inclination à l'Espagne, & ce à cause de ses interests, auxquels il est grandement attaché, ayant à Naples, Sicile, & Milannois 70000. escus de rente, qui sera cause qu'il n'osera iamais, estant d'une humeur de ne vouloir rien perdre, ny rien hazarder, donner desgoust aux Espagnols : Durant le Pontificat de Gregoire quinziesme, il a eu de grandes prises avec le Cardinal Ludouiso, encores que le Pape les ait reconciliez, neantmoins à la mode de ce pays on n'oublie pas si tost vne inimitié. Comme il a veu que le Cardinal Ludouiso a contracté grande amitié avec les Cardinaux Farnese & de Medicis, & qu'il s'estoit mis bien avec les Espagnols, il s'est attaché avec le Cardinal de Sauoye, & fait demonstration grande de vouloir seruir sa Majesté, & est vny avec les François. C'est à present la posture en laquelle il se tient, on en peut auoir plus longue information de Messieurs nos Ambassadeurs. Le Cardinal Mellini est Gentil-homme Romain, & a tousiours esté employé dès son ieune aage aux charges

charges publiques, il a esté dix huiet ans Auditeur de Rote, depuis Nonce en Espagne, où il fut fait Cardinal par le feu Pape Paul cinquiésme. C'est vn des plus habiles hommes du College, sçauant, & qui a eu tout le long du Pontificat de Paul cinquiésme le maniement principal de toutes les affaires plus importantes, & aujourd huy est grandement employé par le Pape, quasi toutes les affaires du Pontificat luy passent par les mains, estant Chef de la Congregation de l'Inquisition, Grand Vicaire du Pape, fort sçauant & intelligent, & tenu en grande reputation. Aussi au Conclaué dernier, il a eu le plus de voix, & de suffrages que pas vn, & ne s'en a gueres fallu qu'il n'ait esté Pape, en ayant esté fort proche. La mauuaise intelligence qui est entre luy & le Cardinal Ludouïsio lui a osté le Pontificat, s'estant ledit Ludouïsio déclaré chef de l'exclusion. Le nombre de ses freres & nepueux luy a fait vn grand tort, & à ce que ie croy les François n'y alloient pas volontiers, estant iugé auoir vne grande inclination à l'Espagne, où il receut le Chapeau de Cardinal, au mesme temps que le Pape d'aujourd huy estant lors en France: Neantmoins en toutes les affaires qui se sont presentees pour sa Majesté,

il s'y est employé avec affection, soing, & diligence, & ne peut-on nier qu'il n'ait bien souuent, & bien vtilement seruy. Il n'a iamais voulu pension d'Espagne pour luy, ny pour les siens. Monseigneur l'Archeuesque de Lyon, qui a esté son compagnon à la Rote, peut beaucoup avec luy, il croid aussi quelque peu, & void volontiers. Il sera aisé à Monsieur de Bethune, s'il le iuge expedient, pour le service du Roy, de le mesnager, estant certain que c'est le plus sçauant, & vn des plus intelligents & habiles hommes du College. Le Cardinal Lanti est Romain, il estoit Auditeur de la Chambre: Le frere du feu Pape Paul cinquiesme auoit espousé sa sœur, il est frere de Messieurs de Sulmone, & de Messieurs de Nari, il a soixante-trois ou soixante quatre ans, homme doux, affable, qui fait de grandes aumosnes, assez intelligent, on l'a soupçonné d'auoir quelque inclination aux Espagnols, mais neantmoins on ne l'a point recogneu, car aux affaires qui se sont presentees, il a tousiours donné toute sorte de satisfaction à Messieurs nos Ambassadeurs. C'est vn sujet fort capable, & qui seroit bien agreable au College: mais la proximité qu'il a avec le Prince de Sulmone,

donne

donne apprehension aux ennemis de Borghese. Le Cardinal Berardi est aussi Gentil-homme Romain, bien apparenté, sçauant homme, l'un des plus doux & affables Cardinaux qui soient à Rome, & qui a tousiours cherché d'obliger tout le monde, sans faire aucun ennemy, estimé tres-homme de bien, sans aucun interest, qu'on sçache avec la France, & avec l'Espagne, honorant esgalement tous les Ministres des Princes : il a enuiron cinquante-trois, ou cinquante-quatre ans, & est vn des sujets qui a plus la voix du peuple, & de toute la Cour pour estre Pape, ayant toutes les qualitez requises pour pretendre au Pontificat. La parenté qu'il a, & amitié estroite avec le Cardinal Mellini seule, luy a fait obstacle, s'estant le Cardinal Ludouissio déclaré chef de leur exclusion. Le Cardinal Leni, cousin germain de Borghese, en ceste qualité a esté fait Cardinal, aussi dépend-il entierement de luy, n'ayant autre volonté, ny voix que celle qu'il luy donnera. Le Cardinal Capponi Florentin fut fait Tresorier par le Pape Leon vnzième, & par le Pape Paul cinquième Cardinal. C'est vn fort bon esprit subtil, aigu, qui a medjocrement étudié, & entend bien les affaires d'Estat, & homme qui peut bien

seruir , & qu'on pourroit aisément attirer au seruire du Roy , principalement si on contentoit le Cardinal Vbaldini : car il y a vne amitié plus que fraternelle iuree entre eux deux , il a quasi gouverné neuf ou dix ans le Cardinal Borghese , mais ayant eu quelque prise avec le Cardinal Campora sur la fin du Pontificat il eut quelque desgoust de luy Borghese , & en mesme temps que le Cardinal Vbaldini rompit avec luy : En fin cela a esclaté , & tous deux ensemble se sont reünis avec Ludouïsio , & se sont quasi declarez ennemis de Borghese. Tellement qu'il faut faire estat que ces deux Cardinaux suivront le Cardinal Ludouïsio , & non pas Borghese. Aussi du temps de Gregoire quinziesme ils ont eu bonne part au Pontificat. Le Cardinal Cataffa Archeuesque de Naples issu de la maison de Paul quatriesme fut Nonce en Espagne , & là pour la jurisdiction Ecclesiastique eust quelque rupture. Le Pape Paul cinquiesme pour le retirer avec honneur le fit Cardinal. Il est plein de bonté , de pieté signalee , & qui est mis au nombre des Spirituels : C'est vn de ceux à qui l'Espagne donne l'exclusion, tant parce qu'il est recogneu assez roide à la conseruation des Loix de l'Eglise , que pour la memoire de Paul quatriesme , qui
leur

leur mit en doute le Royaume de Naples, & l'Italie. Le Cardinal Riuarola Genevois, à son arriuee à Rome, courtoisa Monsieur d'Alincourt, lequel le donna à Borghese. Il eut tant de dexterité, & bonne fortune, que sans auoir estudié, il fut fait son Auditeur, Nonce extraordinaire en France, & depuis Cardinal: Il n'a iamais, que ie sçache, rendu aucun tesmoignage de gratitude à la France, il a vn fort bon esprit, & est auourd'huy vn des grands conseils de Borghese, ayant pris la place, comme on dit de Pignacelli, Borghese en peut disposer comme de soy-mesme. Le Cardinal Crescentio Gentil homme Romain, du temps de Monsieur de Bethune, courtoisoit la France, il fut fait Auditeur de la Chambre, & depuis Cardinal. Il peut auoir environ cinquante ans, mediocrement sçauant, mais fort doux & agreable, il a autresfois recherché auoir pension en France, & veritablement il a tesmoigné tousiours d'y auoir inclination: Maintenant il arrine à l'age, qu'on commence à penser au Pontificat, peut estre n'y voudroit-il pas entendre, de peur de faire declaration publique: mais à mon aduis, on le doit mesnager, & il sera fort aisé à Monsieur de Bethune de le faire, & le rendre fauora-

ble aux interests du seruice du Roy. Le Cardinal d'Ara çœli est assez cogneu en France, & par toute l'Italie, pour vn des hommes de bien du College, grand Predicateur Theologien, remply de pieté, & de zele enuers la Religion, l'honneur qu'il receut en France, lors qu'il y vint comme General des Freres Prescheurs tenir le Chapitre, la liberté avec laquelle il a tousiours parlé contre ceux qui vsurpent la Iurisdiction Ecclesiastique, & l'opinion qu'on a conceuë que c'est vn homme hardy, courageux; & qui ne flechiroit pas aisément pour les respects humains, sont cause que les Espagnols aux deux derniers Conclauës luy ont fait l'exclusion: aydez en cela de Borghese, qui ne veut point veoir vn Pape qui luy a fait autresfois des corrections fraternelles: il n'a iamais voulu autre benefice que l'Euesché d'Osmo, où il vid avec vne sainte austerité, & charité admirable. C'est vn des Cardinaux dits Spirituels. Le Cardinal Borgia Espagnol de nation, est fort homme de bien, deuot, charitable, & d'assez bon esprit. C'est luy qui est protecteur, & a la principale direction des affaires d'Espagne, & avec lequel le Duc de Pastrana consulte toutes les affaires: Il en donne part au Cardinal de Trejo
aussy

aussi Espagnol , qui est fort honneste , & fort courtois , mais non pas d'esprit releué. Ledit Duc a besoin de bon conseil , car il est tenu vn peu foible pour ceste Cour , s'amusant plus à faire des bombances , & des Comedies , & à courtiser les Dames , qu'à la negotiation : Nous auons cet aduantage , que les Ministres d'Espagne ne sont pas plus habiles que les nostres , & les Espagnols mesmes le recognoissent. Le Cardinal Dascoli Religieux de saint François , nay de basse maison , fut fait Cardinal par vn excès de fortune , n'estant quasi pas cogneu du Pape Paul cinquieme qui vouloit faire Cardinal vn de l'ordre de S. Dominique , pour ne donner jalouſie il se resolut d'en faire vn de saint François. Et par ce qu'en ce temps-là le General , qui estoit Monsieur l'Archeuesque d'Ambrum estoit François , il choisit celuy cy qui estoit Procureur General , qu'il ne cognoissoit quasi pas , & qui n'auoit iamais songé en dormant de pouuoir aspirer à ceste dignité : Il n'est pas ignorant en Theologie , mais bien aux affaires du monde , n'a pas trop bonne reputation , quoy qu'il soit grandement riche & bien accommodé , neantmoins il vit fort mescaniquement & avec peu de dignité , selon le bruit qui court : Il faict

de grandes demonstrations & submissions aux Espagnols, & mesmes dés long temps il a telmoigné y auoir vne tres grande inclination : Borghese en ce dernier Conclau fit quelque effort pour le faire Pape, mais il y trouua de grandes auersions, voire mesmes parmy ses creatures, qui ne le iugerent pas capable de pouuoir gouuerner l'Eglise de Dieu. Le Cardinal Vbaldini est tant cogneu en France, qu'il n'est beioin qu'on en donne autre relation, Il se plaint qu'on ne luy paye pas les pensions qu'on luy a promis, D'autre-part les Ministres du Roy se plaignent qu'il ne veut point faire declaration d'estre seruiteur du Roy : Il est maintenant reuny totalement avec Ludouifio, comme estant tres mal avec Borghese. Le Cardinal de Sauoye est assez cogneu en France, c'est vn ieune Prince qui fait vne vie exemplaire, fort deuot, debonnaire, & qui neantmoins tient bien sa grauité & acquiert reputation à Rome. Le Pape en fait estime & luy fait honneur, luy deférant beaucoup tant pour la grandeur de sa maison, que pour sa grande pieté & modestie : Il est parfaictement zelé au seruice du Roy, & en ce qui touche les interests de sa Majesté il ne s'espargne pas. Ce qu'on pourroit desirer de luy est qu'il eust vn bon Conseil de quelque personne de qualité en ceste Cour.

Le

Le Cardinal de Medicis vit d'un autre air ; car il prend toutes sortes de plaisirs de jeunesse au jeu & aux compagnées ; Neantmoins quand il est question il reussit fort bien au maniement des affaires, & principalement parce qu'il a deux ou trois habiles hommes aupres de luy, que madame sa mere tient à Rome exprés pour la conduite des affaires du grand Duc. Sa qualité & les interets qu'à le Pape estant né Florentin le rendent grandement puissant à Rome, & ce d'autant plus qu'il se peut promettre des Cardinaux Florentins vne exclusion, si on vouloit faire Pape quelqu'un ennemy de sa maison ; qui est cause que pas un des Cardinaux Papables n'oseroit luy donner desgoust. Sa Sainteté luy a accordé plusieurs graces, il estoit plus puissant au commencement ; Maintenant que les affaires d'Urbain semblent se vouloir troubler, Il y a eu quelques desffiance, ce qui neantmoins n'a pas esclaté. Il se fait *Capo di parte*, principalement estant reuny avec Farneze, Este, & avec les amis & serviteurs de la maison de Mantouë, encores qu'il fasse estat de n'avoir aucune dependance de France, ny d'Espagne ; Neantmoins les interets de sa maison veulent qu'il tesmoigne plus d'inclination à l'Espagne qu'à la France. Il est splendide, liberal, & qui depend volontiers, & dependroit encores plus, si Madame sa Mere ne le retenoit. Il est grandement courtié. Le voisinage des Estats de son neveu, & les alliances des Vrsins, des Sforzes & de Perrecci qui tous dependent, & sont sous la protection du grand Duc, luy

donnent le moyen de paroistre en ceste Cour. Le Cardinal Muti frere du Duc Muti, estoit parent du feu Pape Paul V. Il a esté long temps à son seruice qui le fit Cardinal, on le tient pour vn homme doux & affable, qui a mediocrement estudié & est assez aimé, il est tout à faict attaché aux interests de Borghese, & n'en faut faire autre estat sinon comme d'un de ses suiuaunts. Le Cardinal Sauelli de maison assez cogneuë est âgé à peu pres de 40. ans, gracieux, honneste & courtois, fort apparenté à Rome, Il n'est pas tenu grand homme d'affaires, & est intime amy de Borghese, son inclination & les interests, à ce qu'il dit, de sa maison l'ont totalement engagé au parti d'Espagne, pretendant à vn Archeuesché ou Euesché de Sicile, il despend volôtiers, & ne peut fournir à ses despeses sans incommoder sa maison. Pour le tesmoigner affectionné au party Espagnol, & luy & ses freres en matiere de visite, on donne quelques desgousts à Messieurs nos Ambassadeurs, & entr'autres à Monsieur le Marquis de Cœuure, duquel on peut sçauoir les particularitez.

Le Cardinal Vrsino qui a esté long tēps Comprotecteur de Frâce, & pensionnaire du Roy, son frere aîné s'estant marié avec l'heritiere de Piombino, pour les grāds interests qu'il a avec la maison d'Austriche, & mesme avec les Espagnols a quitté le seruice du Roy, dont il n'est pas à se repentir; Car toutes les esperances que les Espagnols luy auoiēt données se sont reduittes en fumee. Il est de bonne maison, bien sage, grande-

ment deuot, mais qui n'applique pas son esprit aux affaires; On le tient au nombre des Spirituels, qui ne s'engagent à aucun Prince en ce qui est des Conclauës. Le Cardinal Cleifel Allemand, qui a gouuerné plusieurs années l'Empereur Mathias, fut mis prisonnier par Messieurs les Archiducs d'Austriche, qui en fin le rendirent au Pape Gregoire XV. On luy fit son procez, & fut renuoyé absous. Il se sent tant obligé à sa memoire; qu'au dernier Conclauë il a suyui Ludouïsio cōme vne de ses creatures, il est fort pauvre, & ne faiët pas icy grand bruit, quoy qu'en son païs il soit estimé habile homme & sçauant, mais icy il se tient clos & couuert. Le Cardinal Campora est celuy que Borgheze affectionne plus qu'aucune de ses creatures, ayant faiët de si grands efforts pour le faire Pape, qu'il a mescontenté tous les autres Cardinaux ses dependants. Il est né d'assez bas lieu, en la Graffignane entre des montagnes, sujet du Duc de Modene, il n'a pas grandement estudié, ayant faiët sa fortune comme Secrétaire de plusieurs Prelats, & en fin de Borgheze, il est tenu capable des affaires. Le Cardinal Mellini gouuernoit le feu Pape Paul V. & Pignacelli, & luy Borgheze, il a vne tres-estroitte intelligence avec les Espagnols, & n'a iamais fait grand estat de la France. Il s'est retiré à son Euesché de Cremona, se sentant assez mal voulu du College. Il desire laisser enuicillir par son absence les bruits qu'on a faiët courir de luy. C'est vn de ceux que Ludouïsio exclud, *in primo capite*. A ce dernier Conclauë on n'a pas osé parler de luy, quoy que

porté de Borgheze & des Espagnols puïssammēt.
 Le Cardinal Cobelluccio de S. Suzanne est en
 grande reputation à Rome (comme homme sça-
 uant) de vie exemplaire, qui ayme & protege
 tous gens de sçauoir. Il a esté puïssant près le Pape
 Paul V. mais à cause de sa liberté, & qu'il n'a pas
 sceu taire les choses qu'il iugeoit mal faictes, il a
 tousiours esté mal avec Borgheze, lequel en fin
 à ce dernier Conclauē s'est déclaré, iusqu'à luy
 donner l'exclusion publique, la fondant sur ce
 qu'il s'estoit trop accosté de Lu douisio ayant esté
 employé par le feu Pape Gregoire XV. qui en fai-
 soit grand estat, comme d'un homme de bien &
 sçauant: Il est tenu vn peu rigide, & qui ne peut
 supporter que les choses aillent mal; Les François
 & les Espagnols se loient de luy à cause de sa fran-
 chise, s'estans employé volontiers és choses qu'il
 a iugé pouuoir faire en conscience, sans repaistre
 de vaines esperāces ceux qui auoient affaire à luy,
 l'opposition seule de Borgheze luy a osté le Pon-
 tificat. Le Cardinal Priuli est au liēt malade, sans
 esperance d'en releuer, est perclus de la moytiē du
 corps, & ne peut pas viure cinq ou six iours, à ce
 que disent les Medecins. Le Cardinal Sennioni
 est d'un village de l'Estat de Siēne, nourry basle-
 ment en cette Cour, apres la mort de feu Ascoli
 son maistre, il entra au seruice de Borgheze, &
 comme il est habile homme, & sur tout en la pro-
 fession du droit Ciuil & Canon, en maniant les
 affaires de son maistre, il acquit les bonnes graces
 du feu Pape Paul V. & de Borgheze, comme con-
 fident il fut enuoyé Nonce en Espagne, & là faict

Cardinal , c'est vn des sujets que porte grandement Borgheze au Pontificat ; car il est loué en ceste Cour pour homme capable de toutes sortes d'affaires, humble, honeste & courtois. Le Pape d'aujourd'huy l'a employé en la negociatiō d'Urbain, & l'a fait Legat à Ferrare, encores qu'il fasse profession & estude particuliere d'estre du tout independant, & honorer esgalement la France & l'Espagne, neantmoins on croit qu'il a quelque propension à l'Espagne, & qu'en sa Nonciature il se soit vn peu trop accosté des Espagnols, suivant en cela l'intention de Borgheze, pour lors totalement engagé à l'Espagne. Et ce qui en accroist le soupçon est, qu'il est vn de ceux que les Espagnols nomment au premier chef. On ne peut toutesfois desnier que ce ne soit vn bon sujet, & vn bon Ecclesiastique qui n'a iamais donné desgoust à aucun Ministre de sa Majesté. Le Cardinal Bentiuoglio a demeuré si long temps en France, ses merites & qualitez y ont esté tant reconnus, qu'il est inutile d'en parler, Il fait toutes sortes de demonstrations publiques d'estre en tout & par tout seruiteur du Roy, comme ie croy qu'il est, aussi en a il raison. Il conserue soigneusement l'estroite amitié qu'il a avec Borgheze, augmentée par l'alliance qu'ils ont ensemble, ayant fiancé son nepueu à la niepce du Cardinal Leni. Cette grande vnion en ce dernier Conclauue a donné quelque ialousie au Cardinal de Saouye & à Monsieur l'Ambassadeur. Le Cardinal de la Valette a acquis vne tres-grande reputation à Rome, non seulement dans le College, mais

parmy la Noblesse & le peuple, sa presence a esté grandement vtile & necessaire au seruice du Roy, & honorable à toute nostre nation. Le Cardinal Valerio Gentil homme Venitien, a esté employé en plusieurs gouuernemens de l'Estat Ecclesiastique, & a reussi assez bien, il est tellement embarqué & engagé avec Borgheze qu'il a laissé souuent les interets de la Republique pour luy complaire. Autres-fois les Cardinaux Venitiens s'vnissoient avec les François; Il ne faut plus attendre cela, car Valerio & Priuli n'ont recherché aux deux derniers Conclaves que de dōner contentement à Borgheze. Le Cardinal Squaglia est de Bresse d'assez basse maison; neātmoins de peur qu'il a eu qu'on ne luy objectast d'estre né sujet des Venitiens, Si tost qu'il fut fait Cardinal, il se publia estre Cremonois mit les armes d'Espagne sur sa porte, & fit toutes demonstrations que fait vn sujet du Roy d'Espagne. Il estoit totalement incogneu en ceste Cour. L'amitié que luy portoit Mellini le fit Commissaire du S. office, & en fin Cardinal. On dit qu'en ce dernier Conclaué estant embarqué d'esperance au Pontificat, il a rendu de mauuais offices à Mellini son bien faicteur, ce qui luy a suscitē vne haine vniuerselle: Ioinct qu'il n'est pas en grande reputation, ny de sçauoir, ny d'autres qualitez recommandables. Ludouisio auoit entrepris de le faire Pape; mais ayant descouuert le peu d'inclination qu'auoit le College à sa personne, il quitta son entreprise; Car on luy dit tout haut que le College ne se pouuoit fier à vn auquel l'ambition auoit fait

renoncer son païs, ses amis & ses bienfaiteurs. En la dernière Election du Pape il se trouua vn billet perdu, la voix publique est que ce fut luy qui le fit perdre, aussi tient-on qu'il n'est gueres agreable au Palais. Le Cardinal Zolzen de grande maison d'Allemagne a en main les affaires de l'Empereur; Il est estimé de bonne vie, courtois, liberal, & est en bonne odeur en cette Cour. Le Prince Sauelli a le nom d'Ambassadeur de l'Empereur, mais en effect, c'est Zolzen seul qui a le maniement des affaires, qu'il confere avec Monseigneur Rêboldo Auditeur de Rote Allemand, car ces Messieurs les Allemands ne prennent pas plaisir que les Italiens sçachent trop le secret de leurs affaires. Le Cardinal Roma estoit Aduocat Consistorial en ceste Cour, vn de ses oncles Senateur de Milan auoit des affaires de Borgheze, cela avec le credit de Campora son intime amy par vne faueur extraordinaire le fit Cardinal, C'est vn bon Seigneur fort courtois & honeste & de médiocre sçauoir, Il est assez aymé en cette Cour; quoy que sujet d'Espagne, & qu'il pretend aux Eueschez de Sicile, neantmoins il n'abandonnera iamais Borgheze. Le Cardinal Ludouifio neptieu du Pape Gregoire XV. est assez connu en la Cour de France, dès sa ieunesse il a esté employé & nourry aux affaires, & sur tout au traicté qu'on fit pour la restitution de Verseil, son oncle estant Nonce & depuis Cardinal enuoyé par le Pape Paul V. pour ce traicté. Au retour il se mit en Prelature, fut mis Prelat en la Consulte & en la Congregation *de bono regimine*:

En toutes les charges il a reüssi, estant estimé habile homme, sçauant pour son aage, & capable d'affaires. Il a gouuerné deux ans & demy le Pontificat absoluëment: Au commencement il a tesmoigné vne tres-grande inclination à la France & auersion aux Espagnols: Mais s'estant picqué avec Bentiuglio, & voyant que feu monsieur de Luines se portoit contre luy, il se resolut de faire le mariage de son frere avec la Princesse de Venose qui l'obligea de s'accommoder avec les Espagnols, avec lesquels il est tres-bien: Neantmoins il a gardé tousiours vn grand respect au Roy & à ses ministres, faisant profession d'estre Ecclesiastique, & ne despendre en rien des Espagnols. Il est courageux, desireux d'honneur, de gloire & de reputation. La plus grande plainte qu'on a de son gouuernement, est qu'il a esté durant la vie de son oncle trop absolu, ambitieux & imperieux, ce qui luy a suscitè beaucoup d'ennemis. Il est estimé, au iugement mesme de ses ennemis, vn des plus habiles hommes du College: En toutes les Congregations de Cardinaux où il se trouue il paroist grandement; car il sçait & estude: depuis la mort de son oncle, il a acquis tres-grande reputation à Rome, tant pour ce qu'il se fait valoir en toutes sortes d'actions publiques, que pour ce qu'il fait pour plus de trente mil escus tous les ans d'aumosnes, viuant maintenant avec grande courtoisie, & honorant tout le monde. Au commencement on croyoit que le Pape le verroit mal volontiers, mais on reconnoist

gnoist qu'il l'estime beaucoup, & n'a nulle enuie de le falcher. Par raison d'Estat il s'en est allé pour 5. ou 6. mois à Boulogne, tant pour laisser enuieillir les bruits qu'on faisoit courir à Rome, que parce qu'il veut faire cognoistre qu'il ne se mesle d'aucun affaire, & ne veut donner jalousie au Cardinal Barbarin. Il a 7. ou 8. voix dans le College dont il peut disposer, & est grandement considerable. L'interest qu'il a en France à cause de S. Martin le retient assez. Le Cardinal Gaetan fut fait Cardinal par le Pape Gregoire XV. tant pource qu'il est des maisons principales de Rome grandement estimé en cette Cour, que parce qu'il estoit tres mal avec Borgheze, ayant esté nouvellement rappelé de la Nonciature d'Espagne par le feu Pape Paul V. avec peu de satisfaction; cette mauuaise intelligence luy seruit beaucoup en la conjecture des affaires, estant suruenue la rupture de Borgheze avec Ludouisio. Il est recogneu en cette Cour pour vn bel esprit, sçauant aux bonnes lettres & sur tout aux humanitez & en la poësie, courageux, & qui entend bien les affaires de la Cour de Rome, il sert de conseil à Ludouisio, & à ce dernier Conclau ne l'a pas abandonné, quelque inclination & obligation que luy & toute sa maison aye à l'Espagne. On tient que c'est luy principalemēt qui a accommodé Ludouisio avec les Espagnols, & qui fut cause de ce mariage, & le negotia en Espagne. Buoncompagno petit fils du feu Pape Gregoire XIV. fut fait Cardinal par le feu Pape Gregoire XV. pour tesmoignage de gratitude enuers la memoire de Gregoire qui l'auoit

appellé a Rome, & auoit esté auteur de sa fortune. Il suiura en tout les volontez de Ludouifio, son inclination est vers l'Espagne, car son frere a tout son bien au Royaume de Naples, il est estimé fort honneste & gracieux, & n'est pas ignorant. Le Cardinal Aldobrandin petit nepueu du feu Pape Clement VIII. à cause de l'alliance qu'il fit avec la maison de Ludouifio, fut fait Cardinal par Gregoire XV. il a reüny à la faction de Ludouifio des creatures de Clement, & peut quelque chose estât ainsi reüny, autrement seul il seroit fort foible, il est tres-honneste & fort courtois, & tesmoigne n'auoir perdu la memoire de l'affection extraordinaire que Clement portoit au Roy, & à la France, & aux occasions, ie croy que pour le seruice du Roy on s'en pourroit preualoir. Le Cardinal de Torres est ieune, estant Nonce en Pologne, il sceut si bien gagner les bonnes graces du Roy de Pologne qu'il obtint la nomination, il a force parens & amis en cette Cour, estant allié aux premieres familles de Rome, est courtois, honneste, & tres-agreable en conuersation; quoy qu'il soit yssu de race Espagnole, neantmoins il n'a rien du tout del'orgueil Espagnol. Estant pauvre Cardinal, il est apres à poursuiure quelque Euesché ou Archeuesché en Sicile, & faict de grandes submissions aux Ministres d'Espagne. Il est totalement dependant de Ludouifio, & y a peu d'apparence qu'aux Conclaves ny ailleurs il l'abandonne. Le Cardinal Rodolfi est de race Florentine, mais habituee à Rome de long temps, son frere auoit seruy long temps l'Empereur Mathias, & ayant ob-

tenu en fin vne nomination par ceremonie Ludouifio, avec lequel demeure vn de ses freres, le fit preferer aux autres. Aussi en effect il faut croire qu'il suiura plustost ledit Ludouifio que l'Empereur mesme, encore qu'il soit grandement lié, & interessé avec les Espagnols, son frere le Marquis ayant tout son bien au Royaume de Naples, & luy vn Euesché de dix mil escus de rente. Il est en reputation d'estre bon Ecclesiastique, & vn esprit assez ordinaire. Le Cardinal Boigheze se peut promettre d'auoir 15. ou 16. Cardinaux qui le serviront pour la pluspart du temps. Sçauoir, luy, Mellini, Lanti, Veraldi, Leni, Riuarola, Cressencio, Muti, Ascoli, Sauelli, Campora, Semini, Valerio, Roma, Squaglia, quelques vns y veulent adiouster Bentiuoglio; Le Cardinal de Floréce reüni avec Farneze & Este peut auoir avec luy iusqu'à 7. Cardinaux. Sçauoir luy, Farnese, Este, Monte, Sforza, Visini & Perrecci. Ludouifio lié avec Aldobrandin peut reünir iusqu'à 13. Cardinaux. Sçauoir luy, Aldobrandin, Bardini, Deti, Genasio, Capponi, Vbaldini, Pio, Cleisel, Gaetano, Boncompagno, Torres, Rodolfi. Les Espagnols ne se peuuent asseurer que de six Cardinaux, Borgia, Trejo, Madruccio, Zolerem, Doria, Spinola. Les François seulement 4. Sauoye, Beuilaqua, la Vallette, Bentiuoglio, il y a 4. Cardinaux qu'on appelle Spirituels, qui font profession d'indépendance, & de donner leur voix à qui le S. Esprit leur reuera. Sçauoir Borromeo, Caraffa, Araçœli, & Santa Suzanna.

Après le College des Cardinaux, on confide-

re les Ambassadeurs qui sont en cette Cour. Le Prince Sauelli exerce la charge d'Ambassadeur de l'Empereur, plustost par apparence que par effect, Car le Cardinal Zoloren a seul le secret des affaires, & traite plus souuent avec le Pape que ledit Ambassadeur. Le Duc de Pastrana Ambassadeur d'Espagne est fort Gallant & courtois Cavalier, qui n'a gueres de fumee ordinaire à la nation. Il n'a pas reputation d'estre grandement propre à negocier les affaires, & s'en descharge sur le Cardinal Borgia, avec lequel il confere & resout tous les interets de son maistre. On se loüe assez de l'Ambassadeur de Venize en cette Cour, estant reconnu pour homme doux & paisible. Le Comte de S. George tient aujourd'huy le rang d'Ambassadeur de Sauoye, homme fort courageux, & assez cogneu en France, le bruit est qu'il n'est pas trop bien d'accord avec le Cardinal de Sauoye, toutesfois rien ne paroist en public. L'Ambassadeur de Florence est Monsieur Nicolini estimé habile homme; Tant que le Cardinal de Medicis fera en Cour, il ne fera qu'executer les ordres qu'il luy donnera, que consulte & resout toutes les affaires qu'on luy a donué de Florence. Les chefs des deux maisons, Colonne & Vrsins se sont declarez seruiteurs du Roy d'Espagne, les Ducs Sforze & Sr. Gemini sont Cheualiers du S. Esprit & pensionnaires du Roy. Mais messieurs les Ambassadeurs ne s'en loient gueres, & toute la nation se trouue scandalisée de ce qu'ils courtisent publiquement le Cardinal de Medicis, & ont refusé de courtiser le Cardinal de Sauoye prote-

teur de France. Il y a quelques Prelats qui sont aujourd'huy employez, & en predicament d'estre bien tost Cardinaux, entre autres le Gouverneur de Rome Geneuois, de la famille de Marini. Le Seigneur Pamphilio, Auditeur de Rote, maintenant Nonce à Naples, neveu du feu Cardinal Pamphilio, qui a bien seruy le feu Roy, l'Euesque de Montefiascone qui a esté fait Vicetresorier, monseigneur Nary Clerc de Chambre, Prefect de l'Annone, l'Auditeur de la Chambre Geneuois, Monseigneur Guidoni Cremonois President de la Romagne, Monseigneur Verospi Romain Auditeur de Rote, Gouverneur & Vicelegat de l'Vmbrie, Monseigneur Benini Gouverneur & Vicelegat de la Marque. Ces trois Prelats, comme personnes confidentes, & de grand courage, ont esté nouuellement entuoyez par le Pape Gouverneurs des trois Prouinces, entre lesquelles est enclaué le Duché d'Vrbain, pour se tenir prests en cas que la mort arriue au Duc d'Vrbain, ayans ordres de tenir prestes toutes les milices & forces de l'Estat Ecclesiastique, pour se saisir dudit Duché d'Vrbain. Les deux Nonces de France & d'Espagne sont aussi en grande consideration en cette Cour, comme Cardinaux en herbe. Monseigneur Spada Archeuesque de Damietta Nonce aupres du Roy est vn jeune Prelat, mais recogneu fort sage, prudent & discret, lequel depuis quatre ou cinq ans qu'il est employé aux affaires à fait cognoistre que sa prudence & son sçauoir surpassent son âge. Il est luyet du Pape, né en la Romagne, son père est vn grand negociateur qui a amassé

trois ou quatre cents mil escus de bien, dont le fils se fâit bien seruir avec honneur. On espere qu'il donnera grande satisfactiō, le Pape a tres-bonne opinion de luy & dès son aduenement en cette Cour en a fait estat. Monseigneur l'Archeuesque de Graue Nonce d'Espagne est parent fort proche du Cour Bonfi, estimé vn des premiers Prelats de cette Cour & qui a tousiours tesmoigné vne grande affection à la France. Et lors qu'il sera Cardinal on en peut esperer toutes sortes d'assistances & seruice pour le Roy. Outre Messieurs les Cardinaux & les Ducs Sforze & sieur Gemini, sa Majesté a en cette Cour plusieurs pensionnaires qui la seruent pres Messieurs les Ambassadeurs de toutes sortes de qualitez, & entre-autres il y a trois Gentils hommes & Seigneurs Romains, Pompeo Frangipani y tient le premier rang, assez cogneu en France, & est en ceste Cour grandement estimé, comme estant d'une des plus anciennes & premieres maisons de Rome, qui a de tres-grandes intelligences & habitudes à Rome, & a tousiours seruy & sert dignement, fidelement & vtilement le Roy; Autant en peut-on dire du Seigneur Bernardin Nari. Le Sieur Ferdinando Ruçelai est aussi bien estimé en ceste Cour comme sage & honneste Cavalier. Quelques fois le Seigneur Octauio Vbal-diny, frere du Cardinal, void Messieurs les Ambassadeurs. Il est aujourdhuy vn des Capitaines des Gardes de sa Sainteté. Il auoit esté honoré du breuet d'une pension, lors qu'on en bailla au Cardinal son frere; mais depuis six ans en çà ils

n'ont pas esté mis en l'estat des pensionnaires. Pour les Prelats, monsieur l'Archeuesque de Lyon tient le premier lieu qui a acquis vne tres-grande reputation en cette Cour, par sa vertu, pieté & merites Estant recogneu pour tres-capable & intelligent aux affaires d'Italie, grandement estimé de sa Saincteté, & de tous ceux qui sont employez au gouuernement du Pontificat. L'Archeuesque de Selucie depuis 13. ans est employé au seruice du Roy. Le Seigneur Tanculli, à present Euesque de Grossetto en Toscañe, depuis deux ans en ça, a eu pension de sa Maiesté, estant pour lors seruiteur du Cardinal Ludouifio, maintenant à cause de son Euesché il sera obligé à la residence, & ne pourra pas seruir assiduelement comme il faisoit auparauant. Le Seigneur Fabricio de la Bourdesiere, d'extraction & inclination François, estant Camerier du Pape, a vne pension, & a seruy & sert honorablement. Le Seigneur Cortereau Referendaire est grandemét assidu aupres de Messieurs les Ambassadeurs. Monseigneur Menocchio est aussi Referendaire déclaré, depuis dix ans en ça seruiteur du Roy. Il a force intelligences & entrée en cette Cour & plusieurs de messieurs nos Ambassadeurs s'en sont bien seruis. Monsieur Arnault de Trye depuis trois ans s'est habitué en cette Cour & y est aymé & estimé; Le seigneur Allemani gentilhomme du Contat d'Auignon n'est pas camerier du Pape, mais seruiteur domestique de Borgheze, ayant porté le chapeau au Cardinal de la Valette: Monsieur de Luines, comme estant de son

pays, luy procura vne pension du Roy il y a environ trois ans. Monsieur de Flauigny qui a esté camerier quelques années du Pape, s'est retiré en son pays de Lorraine, où ils'est marié ayant totalement quitté cette Cour. Pour le sieur Abbé Delfin nepueu du feu Cardinal, il ne demeure pas en cette cour, mais à Venize, c'est à messieurs les Ambassadeurs qui sont pour le Roy à Venise à en donner relation, comme aussi du sieur Comte de Porte. Les merites du pere & del'oncle anciens seruiteurs du Roy en Italie leur ont procuré ce bien faict de sa Majesté, comme aussi les merites du feu Cardinal Baronio sont cause qu'on ait donné pension au sieur Leandro Baronio son nepueu, & que sa Majesté ait doné au fils de feu monsieur Barclay la pension qui se donnoit à feu son pere. Monsieur de Sponde tres-sçauant & habile homme, & en grande estime en cette cour, sert sa Majesté près de Messieurs les Ambassadeurs honorablement, comme aussi le sieur Oratio Perinelli qui sert de Secretaire Italien à Messieurs nos Ambassadeurs. Et le sieur Rabi Maistre des courriers pour le Roy à Rome, depuis que monsieur le Commandeur de Silleri est venu Ambassadeur en cette ville, il a procuré vne pension pour le sieur Pierre Eschinard solliciteur & Banquier, duquel Monsieur de Puisieux se sert de longue main, ayant fait donner à ses freres & enfans forces benefices & quelques pensions sur les Abbayes. Il a aussi trois Gentilshommes Geneuois qui sont anciens seruiteurs du Roy dont on faict grand estat, Paolo Fieschi, Ambrosio Lomellini

mellini & Claudio Marini. Au iourd'huy en cette Cour il y a trois affaires principales sur le tapis, La premiere & la plus grande est l'affaire de la Valtoline, de laquelle sa Majesté sera plainement informée par Messieurs Gueffier ou Commandeur de Sillery, lequel n'en a iamais voulu conferer avec pas vn Cardinal ny Prelat seruiteur de sa Majesté en cette Cour, toutesfois on en fait diuers iugemens, & en particulier sur le sujet du passage que veulent auoir les Espagnols pour aller en Allemagne. Les discours qu'on fait sont, que les Espagnols qui auoient tousiours protesté de n'auoir autre mire que la conseruation de la Religion Catholique; maintenant leuant le masque, font cognoistre à tout le monde, en voulant si auantageusement profiter de cette occasiō, que leur interest particulier, & non le zele de la Religion les a engagez en ceste entreprise si preiudiciable à toute l'Italie. On dit que leur accorder le passage en Allemagne, est leur abandonner les Princes d'Allemagne, anciens confederez de nostre Couronne & que c'est oster toute sorte d'esperance au Prince Palatin de recouurer ce qu'il a perdu. On parle aussi ouuertement, de ce qu'on a accordé que le sieur Marquis de Bagny eust le commandement des gens de guerre qui sont à la Valtoline, estant icy recogneu pour partisan du Roy d'Espagne, en ceste qualité ayant accompagné le Connestable Colonne au voyage qu'il fit en Espagne il y a quatre ans. On croit que sous ombre de conseruer la Religion, les Espagnols

ont inseré tant de conditions, que l'exécution du traité en sera plus mal-aisée que n'a esté le traité mesme. La seconde affaire est celle de la Promotion, qui entretient cette Cour. Aujourd'huy il y a vnze places vaquantes, on croit asseurement que si la Sainteté est recherchée tant soit peu; elle fera vn Cardinal François & vn Espagnol, mais il faut que cette recherche vienne de nous, parce que le Duc Pastrana Ambassadeur d'Espagne seroit plus aisé de retarder la promotion que de l'aduancer, à cause que le sujet que nomme sa Majesté Catholique, nepueu du Comte Oliuarez, qui n'a que 16. ou 18. ans, ne luy agree pas, & parce la Sainteté a fait difficulté sur l'age. Il espere qu'on nommera vn sien oncle, nommé à ce qu'on dit en second lieu: Et pretend, en tirant l'affaire en longueur, obtenir avec le temps cesté premiere nomination. Il importeroit grandement pour l'honneur & splendeur du seruice du Roy, au commencement d'un Pontificat, en la premiere promotion, d'auoir vn Cardinal François.

La derniere affaire qui se traite en ceste Cour, & qui importe generally à tout le repos d'Italie, est l'affaire du Duché d'Vrbain. Iules II. qui a plus pensé à l'exaltation de sa maison qu'au repos d'Italie, inuestit ses neveux dudit Duché qu'il auoit osté à Laurens de Medicis, & y adjousta Pesaro, Lenegaglia, les Duchez de Montefeltro & Castel Durante, qu'aucuns disent auoir esté des fiefs dépendans de l'Empire. La nature des fiefs dépendans du S.

Siege, est que l'investiture s'en fait aux masses, sans que les filles y puissent iamais rien pretendre. Le Duc d'Vrbini qui vit encores auourd'hui a 76. ans ou enuiron, il auoit vn fils qui mourut ces iours passez d'une mort subite, ayant laissé vne seule fille de la sœur du feu grand Duc qu'il auoit espousé: Par consequent ledit Duché d'Vrbini doit infailliblement, apres la mort dudit Duc, retomber à l'Eglise, & estre reünny au patrimoine de S. Pierre, sans qu'on le puisse plus infeoder, suiuant les Bulles tres-rigoureuses des Papes, que tous les Papes & Cardinaux iurent solennellement. L'accident de la mort dudit Prince d'Vrbini arriva 7. ou 8. iours auant la mort de Gregoire XV. Si tost que le Pape a esté esleu, & guaruy de sa grande maladie, le plus grand soin qu'il aye eu a esté de pouruoir que ledit Duché retombe à l'Eglise, sans aucun contredit ny diminution. Et à cét effect il enuoya incontinent trois des principaux & plus confidens Prelats qu'il ait aux trois plus prochaines prouinces dudit Duché, qui ont ordre & pouuoir de mettre en armes tout l'Estat Ecclesiastique, en cas de quelque changement & nouveauté. Ce qui donna sujet de ialousie à la Sainteté, fut la resolution prise à Florence de faire le mariage du grand Duc & de la petite fille du Duc d'Vrbini, de conseil, comme l'on dit, avec le grand Duc. Le Comte Francesco Gambara fut enuoyé par ledit Empereur audit Duc d'Vrbini sous apparence de condoléance, mais en effect pour le semondre à prester consentement


que les Duchez de Montefeltro, & Castel-Durante, & autres places, apres sa mort, retournaissent à l'Empereur, qui offroit d'en donner l'investiture à la petite fille, c'est à dire au grand Duc son mary. Ceste proposition ne fut pas si bien receüe qu'on croyoit. Car le Duc d'Vrbini qui vit en Philosophe, & veut passer le reste de ses iours en repos, fit response qu'il tenoit tout le Duché d'Vrbini & terres enclauées du saint Siege Apostolique, par les biens-faits de Sixte IV. & de Iules II. ses predecesseurs, & par consequent qu'il estoit obligé de ne prester aucun consentement qui peust preiudicier à l'Eglise, & que si apres sa mort l'Empereur auoit des pretentions, il les demesleroit avec le Pape. Ceste froide response ne pleut gueres au Conseil du grand Duc. En mesme temps le Pape enuoya audit Duc d'Vrbini le Cardinal Cénini, qui trouuant l'humeur du Duc disposee, tira de luy vne declaration solennelle, par laquelle apres sa mort, dès à present, comme pour lors, recognoissant de bonne foy tenir tout ce qu'il possede audit Duché d'Vrbini & enuiron de sa Sainteté, il consent que toutes les places soient remises entre les mains du Pape, & toute sa souveraineté par faute d'hoirs males. Ceste declaration estant es mains du Pape, il pressa le grand Duc, comme mary de la petite Princesse, de la ratifier; Madame l'Archiduchesse mere, & madame la grand Duchesse grand' mere dudit grand Duc, qui aujourd'huy gouverne tout à Florence, en vertu du testament du feu grand


Duc, assistée de quatre Conseillers, & du Cardinal de Medicis, tiroit tant qu'elle pouuoit en longueur cette resolution. Mais le Pape les pressa tant, qu'à la fin de peur d'entrer en rupture, ledit grand Duc, sa mère, ayeule, & tout le Conseil ont ratifié ladite déclaration du Duc d'Urbain. Le Pape il y a deux mois, fit lire en plein Consistoire lesdites déclarations & ratifications. L'affaire estoit en très-bon estat, mais vn accident qui est suruenü a donné suiet de des fiance de part & d'autre. Sa Sainteté pensant mieux asseurer l'affaire, prit expedient de faire vn nouuel Archeuesque d'Urbain, qui sceut mieux mesnager les esprits du peuple, & veiller à ce que rien ne se passast au prejudice de la reunion dudit Duché; A cet effect il fit election de Monseigneur Lancorio Prelat très-sçauant, & qui escriit l'histoire de ce temps, mais iugé d'humeur ardente, impatiente & vn peu violente, auquel il conféra l'Archeuesché d'Urbain, Si tost qu'il fut arriué, au lieu de s'insinuer aux bonnes grâces dudit Duc, il entra en dispute pour les ceremonies, & en traittant d'affaires il entra en rupture manifeste avec le Duc d'Urbain, iusqu'à vser de menasses; Dont ledit Duc irrité renforça toutes ses places & garnisons d'hommes, & de munitions de guerre, & y mist pour la pluspart des soldats sujets au grand Duc & des Neapolitains, & dit-on qu'il tesmoigne se repentir d'auoir fait lesdits déclarations. Cette action donne très grande jalousie au Pape, joint aussi le bruit qu'on fait courir que le grand Duc,

à cét' heure qu'il est saisy de la petite fille ne se soucie gueres de l'espouser. Et qu'on traite de la donner au fils aîné de l'Empereur, ce qui renouelleroit les pretentions qui seront tousiours fomentées par le Roy d'Espagne, qui voudroit bien que la puissance du Pape ne creust pas d'auantage en Italie. Ledit Duché d'Vrbín vaut enuiron deux cents mil escus de rente, mais il est remply des meilleurs soldats de toute l'Italie gens aguerris, & qui ont fait tousiours profession des armes. Il y a douze Eueschez, deux ports de mer, sept ou huit bonnes forteresses & bien munies; Bref, cela accommode grandement l'Estat Ecclesiastique, & le reünit s'estendant maintenant d'une mer à l'autre. Ceste petite fille d'Vrbín ne laisse d'estre grandement riche, ledit Duc ayant pres de cinquante mil escus de rente au Royaume de Naples en belles terres & Seigneuries, Les biens allodiaux de tout le Duché d'Vrbín luy appartenans, & les terres par luy acquises mouuantes en fief de ladite Souueraineté d'Vrbín, outre trois ou quatre cents mil escus de meubles. Bref, son mariage montera bien à deux millions & plus, & malaisément le grand Duc pourra trouuer vn parti plus aduantageux pour se marier. Le Pape a tesmoigné d'estre mescontét du procedé del' Archeuesque d'Vrbín, qui sans doubte, sans ceste rupture eust esté Cardinal à la premiere promotion. On est apres à racommoder tant qu'on peut cét affaire & à radoucir l'esprit du Duc d'Vrbín, lequel à ce qu'on dit s'est rapproché de sa femme pour voir s'il pourroit encores en son âge auoir

des enfans masles, La Duchesse sa femme estant ieune detrente-cinq ans ou enuiron. C'est l'Estat auquel se trouue auiourd'huy l'affaire d'Vrbain qui seule peut apporter quelque brouillerie en Italie; Car sans doubte le Pape comme tres-zelé enuers le Saint Siege, & desireux d'acquiescer honneur & reputation en conseruant les droicts de l'Eglise, embrasse cét affaire avec tant d'ardeur & de passion qu'il viendra plustost aux extremitez que de permettre qu'on luy oste vn poulce de terre. C'est pourquoy il est en continuelle defiance du grand Duc, & encores plus des Espagnols, qu'il scait ne desirer rien plus que d'abaisser la puissance des Papes en Italie, & diminuer les forces de l'Estat Ecclesiastique, Ceste coniuñcture des affaires est grandement aduantageuse au seruice du Roy qui s'en peut preualoir en faisant offre à sa Sainteté, en cas que quelqu'un voulust reuoquer en doubte les droicts du saint Siege.


F I N.














ure).

Benard

